

PEDENN DA ZANT RONAN

Ton : *D'hor mamm Santez Anna.*

Diskan.

Sant Ronan, hor patron,
Ni ho ped a galon,
Mirit, enn han' Doue,
Hor c'horf hag hon ene !

1.

Kaër eo diouz ar mintin
Ar gliz er parkeier :
Kaër ho pennoz divin
Varnomp e peb amzer.

2.

Ar pinvidic, ar paour
Ama'zo daoulinet :
Eleac'h danvez hag aour
D'ezho roït eürusted !

3.

Roït ive, 'vel guechall,
Yec'hed d'ar glanvourien !
Deuit ato d'hon diouall
Ouz ar vreac'h, ar voçen !

4.

Sellit er mor diroll
Hor c'herent enn danjer,
E m'aïnt o vont da goll :
Truez ! ô Tad tener !

5.

Bleizi 'zo bet gulet
Tro var dro d'ho lochenn :
Bleizi 'zo kounnaret
Ouzomp, ouz hor c'hredenn.

6.

Ann anevaled gouëz
Pell diouzoc'h a dec'he,
Hag ar bed didruez ?
Treac'h 've d'ho pugale.

7.

Nan, nan, rag ho kalon
Morse n'eo bet sklaset,
Nan, galloud hor patron
Morse ne vo berreet.

8.

Evit gloar oc'h hano
Diredit d'hor sicour.
Kasit pell diouz ho pro,
Kasit ann enebour !

9.

Ma n'hor selaouit ket
Ni ielo d'ann daoulin,
'Vit en em glemm bepret,
Dirag sant Korintin.

10.

C'hoant hon deuz da veva
E skeud ho tiouaskell :
Chom hep ho servicha,
Kentoc'h mil guech mervell !

11.

Holl epad hor bûe,
Ni ho pedo laouën,
Da c'hedal mont d'ann Êe,
D'ho meuli da viken.

PERMIS D'IMPRIMER

Quimper, 2 Juillet 1887.

A. SERRÉ,
Pro-Vicaire Capitulaire

Quimper, Moullerez ru an Dudchentil.

